

Regional News Unit AIR Aizawl
Monday, April 01, 2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- Tun thla ni 19-a vote thlak tur, Mizoram Lok Sabha bial inthlanna atan political party hrang hrang leh candidate 6-te chuan beihpui an thlak chhunzawm zel.
- Nimin chawhma lama to thli tleh leh ruah sur khan Mizoram hmun hrang hrangah chhiatna a thlen a, mihring nunna chan phah erawh chu an awm lo nia hriat a ni.
- Isua Krista a thawhleha ni (Easter Sunday) chu khawvel ram dangte rualin Mizoram pumah nimin khan hlim taka lawm a ni.

<><><>

POLL-MAIN PLANKS

Tun thla ni 19-a vote thlak tur, Mizoram Lok Sabha bial inthlanna atan political party hrang hrang leh candidate 6-te chuan beihpui an thlak chhunzawm zel.

Rorel lai ZPM candidate Pu Richard Vanlalhmangaiha chuan Lok Sabha MP a thlan tlin a nih hnu-ah NDA lamah nge INDIA lamah a thut dawn tih chu an party hruaitute thu thu a nih thu a sawi a. Mizoram sorkar thlawpa a tul ang anga thawk turin a inpe dawn niin a sawi a. Mipui hmasawna atan sum tam tham tak hai chhuak turin a bei dawn tih a sawi bawk.

MNF candidate Pu K. Vanlalvena chuan thlan tlin a nih chuan NDA lamah a thu dawn tih sawiin BJP kaihhruai NDA hi inthlanpui-ah hian an chak leh ngei a rin thu a sawi a. NDA-ah awm mah sela Mizoram leh mipuite tana thil tha lo an tih chuan theihtawpa dodala, Parliament chung leh pawnah Mizoram leh state danga Mizo awmte thlavang na takin a hauh zel dawn niin a sawi.

Congress candidate Pu Lalbiakzama chuan Mizoram leh hnam bakah India rama hnam leh sakhaw tenau zawkte humhim tura ding a nih thu sawiin, BJP chu ram chhunga sakhaw tenau zawk te nek chepah a puh a, an thlavang hauh chu a thil tum ber a nih dawn thu a sawi.

BJP candidate Pu Vanlalhmuaka chuan hmarchhak biala MP candidate zingah amah chauh BJP unit President awm chhun a nih avang leh NDA an sorkar leh ngei dawn avangin sorkar laipui-ah dinhmun pawimawh tak a chelh dawn niin a sawi a. Mizoram sum harsatna tawh mek chhawk zangkhaia hmasawna thlen kawngah a pawimawh dawn niin a insawi.

MPC candidate, tun tum Lok Sabha inthlanpuia Mizoram atanga hmeichhe candidate awm chhun Pi Rita Malsawmi chuan thlan tlin a nih chuan sorkar laipui ministry hrang hrang atangin mahni kutkawiha eizawngte tan tanpuina hai chhuah chu a hna pawimawh tur a nih thu a sawi a. Independent candidate Pu Lalhriatrenga Chhangte chuan a din chhan a la puang rih lo thung a, party candidate a nih loh avangin mipui candidate-a a inngaih thu a sawi a ni.

<><><>

THUNDERSTORM

Nimin chawhma lama to thli tleh leh ruah sur khan Mizoram hmun hrang hrangah chhiatna a thlen a, mihring nunna chan phah erawh chu an awm lo nia hriat a ni.

Nimina thlipui tleh khan thla thar April ni 12-a Mizoram pum huap Presbyterian Pavalai Pawl inkhawmpui lian neihna tura sak, Serchhip Dist East Lungdar khelmual ami chu a len tlu sawp hneh hle. East Lungdar VCP Pu K. Lalngaizuala hnen aṅanga thu danin-February thla tawpa sak zawh tawh he pandal hi peih fel thawkhat ni tawhin chei mawi leh thuam that chauh an hmabak tawh a ni.

Pavalai hruaitute sawi dan chuan pandal sak hna hi za zela 98 zawh fel tawh a ni. Inkhawmpui tan hun Pathianni vawi khat chauh in a dang tawh tihin a tlu sawp ta vek a; Pandal ruh rel hi KTP ta niin a chak awmsa tundina sak leh pawh a harsa hmel tawh a, mipuiin a seng hawi hnatlang an thawk nghal a. Nimin chawhnu inkhawm ban khan VCP kaihhruaina hnuaiyah thutkhawm hmanhmawh an ko a, pandal sak leh dan leh thil tul dang te an ngaihtuah a ni. Hriat theih chinah nimin zing dar 9:30 vela thli tleh khan East Lungdarah hian chenna in 10 chuang a len chhia a ni.

Chhiahtlang South-ah pawh chenna in 5 leh Baptist Kohhran Biak In choka nen in 6 a tichhia a, Khawlailung-ah chenna in pakhat chu a liang chawpin a la a, Chekawn khuaah in pakhat a chhe bawk. Paraglyding thlawh chhuahna gallery leh riah buk chung pawh a tichhe nual a, thli leh ruahin a len chhuah bawlhhlawh khawlaiah a tam hle bawk.

Nimina To thli leh ruah thawk khan Champhai District chhungah pawh chhiatna a thlen nual a, mihring tuarna erawh chu a thleng lo. Hriat theih chinah Champhai Rahsi Venga Pu C.Hualthanzuala Assam Type building chu thli-in a len chhe vek a, vawk leh arte an him bakah mihring tuarna a thleng lo. Champhaiah hiaan Pu SH Lianchhunga, Vengsang (concrete in) a chung rangvaa khuh chu thliin a len chhia a, Pu Chhanliana, Vengsang PHE Veng in chung thenkhat pawh thliin a la a. Pu Hrangchina (L) Kanan veng in chung thenkhat thliin a la bawk. DC hmun hlui kiangah thing tluin kawngpui sira Car pakhat ding delh chhiain Champhai Vengsangah thing tluin Excise & Narcotic Dept.office panna a hnawh. Pinehill Adventist Academy pisa leh step chung rangva leh Sikul chung a tui dahkhawlina a len chhe vek a, Sikul quarters pakhat a chung a hawk a, pakhat chu a len chhiat bakah Sikul kawta an thing phun engemawzat a len tlu bawk.

Vaphai khuaah chuan Higher Secondary School chung hmun 3-ah a hawk a, tuizem pakhat a chhe bawk. Pi Mathangi in nak lehlam, a in thlang lam chung rangva chum chawpin a la, Pi Ruatzuali in a nuai chhhe deuh vek a, a in hma lam bang chhete a la ding der der a. Pu Saithanngenga fate bual-in chung a hawksak a, Pu Zarzomawia pangang khawina in, ralflanin an luah mek chu a chung a hawk sak bakah a bang a chhe nual a, Pu Lawmpuia in bang a la nual a, Pu Laldawngliana in pawh a chhe nual a, an in hi a derthawng deuh sa a, sak thatsak an ngai hialin a rinawm, Pu Laithangngura in pawh a chung rangva a hawk nual a, mimal Vawkin chung a hawk nual bawk.

Bungzung khua-ah chuan Pu R. Zarzoliaana leh Pu Hranglawma in chung a hawksak bakah Civil Supply Godown chung, Bungzung High School choka leh Varandah chung leh Presbyterian kohhran Sunday Sikul chung a hawksak.

Zokhawtharah chuan Wesleyan Methodist Kohhran Biak in chung a hawk tih loh chu thil dang chhia hriat a ni lo. Hnahlan-khuaah Pu C. Zorinpuia in (a chung thenkhat leh bang thenkhat), Pu Darchungnunga in a chung rangva thenkhat thliin a hawksak a. Khawbung khua-ah in pakhat a chung a lak bakah a bang a tichhe vek a, an khaw thlanmuala theihai kung tlu chuan thlan a tichhe nual bawk.

Khawzawl district-a Lungtan khuaa UPC (Mizoram) Biak in chu thlipui hian a chhem tlu a, thi leh hliam an awm lo nia thudawn a ni a. Sialsuk Hmunchung Presbyterian kohhran Biak in pawh pulpit awmna zawn in chung chu thlipui hian a hik a ni.

Thli tleh hian Mamit khawpui chhungah chenna In engemawzat a tichhia a. W. Phaileng atanga Mamit-a kawlpheha lakluhna kawngah harsatna a awm avangin W. Phaileng lam atangin kawlpheha lakluh theih a ni rih lo. Mamit khawpui chhung VC hrang hrang hruaitute hnen atanga thu dawn danin Luangpawl VC huam chhungah Pu Lalrindika In chu a chung thli-in a la a, nimin khan VC leh YMA chuan hnatlang koin inchhia thawm hna hi an thawk nghal a ni. RMSA School building leh chowkider quarter chung a la bawk. Heng bakah hian chhe nasa lo, In 3/4 vel a awm bawk. New Mamit VC huam chhungah Pi Zoremthuangi In bang a tichhia a, hei hi nimin vek khan VC leh YMA ten an thawm tha lehngal a ni. Chhimveng VC huam chhungah Pi Lalrinawmi In field veng ami chu a chung a la a, vawinah hnatlanga siam a ni ang. Venghlun branch YMA building, mimal luah chu a chung rangva a la a, nimin vek khan thawm that nghal a ni.

W. Phaileng atanga Mamit-in kawlpheha a lakluhna pawh a chhe nasa hle nia hriat a ni. Kawlpheha lakluh leh thuai a nih theihna turin Power department hnathawkte chuan theih tawp an chhuah nghal a, nimin vek khan hmun thumah inthenin kawlpheha lakluhna hruai chhiatna lai an zawng nghal a. W. Phaileng kawngah thir hruai mau-in a vuak tam tak a awm a, hei hi EE hovin theih ang anga then nghal zel a ni. Dampui kawng hlui lamah thingin kawlpheha hruai a vuak engemawzat a awm bawk a, hei hi group dangin a then hna an thawk nghal bawk. Mamit khawpui chhungah group dangin hruai chhia zawn leh siam hna an thawk bawk a ni. W. Phaileng atanga eng lakluh theih hun tur hriat theih a la ni lo.

Mamit district disaster cell-in a chhinchhiah dan chuan Mamit khawpui chhung bakah Kawrtethawveng a Pu GH Engzama In chung leh Govt. Kawrtethawveng middle school-2 chung thliin a la a. Damparengpui khuaah Pu Piangthara choka chung thliin a la a. Heng bakah hian Parvatui, Darlak, Rawpuichhip ah te In chung thliin a lak leh a bang a tih chhiat an awm bawk. Mamit-a kan Corr sawi danin vanneihthlak takin mihring inhliam erawh an awm lova, in chhia report dawn ho zingah hian a vaia chhia awm lovin thawm that leh theih deuh vek a ni hlawm.

Saitual district-ah pawh nimin to thli thawk khan chhiatna a thlen a. Tawizo khuaah chenna In thenkhat a chung rangva hawk leh bang chhia a awm a, hriat theih chinah In panga leh Bazar shed chung a lenchhia a, vanneihthlak takin hliam tuar leh nunna chan an awm lo. Thil awmdan a hmuna enfiain Pu VL Chaka Hmar SDC Saitual DC office leh a hoten Tawizo khua hi an pan nghal a, in leh lo chhiat dan azira State Disaster Respond Fund atanga tanpuina awm theite khawtlang hruaitute an sawipui. NNimin vek khan in chung hawk leh bang chhiate chu khawtlang hnatlangin a theih chin chin an siam tha leh nghal a, hmabak awmte vawiin hian an chhunzawm leh ang. Heng chhiat tawk te chanchin hi hriat a nih rualin bialtu MLA Prof. Lalnilawma pawhin hma la nghalin, Sawrkar official biak ngaite a be nghal a. In chhe siam hnatlangte thingpui lumna VCP Tawizo kaltlangin a hlan nghal bawk.

Khawzawl District chhung hmun hrang hrangah pawh thli tleh khan hmun tam takah chhiatna a thlen thu thu dawn a ni a. Chenna in engemawzat a tichhia a, Biak in, sikul leh ran in chhia pawh a awm nual bawk nia thu dawn a ni. Hriat theih chinah thli tleh vanga in chhia 71 report tawh a ni a, vanneihthlak takin nunna chan erawh an awm lo a ni.

Thli tleh vanga chhiatna thlangah Tuichang bialtu MLA Pu W Chhuanawma, Dy Govt Chief Whip chuan Khawzawl Bawrh sap Pu K. Lalrohluia biain vanduinawna tawkte chhawmdawl dan tur ruahmanna an siam dun nghal a, a theih ang angin hma lak nghal a ni.

Khawzawl distric chhunga chhiatna thleng report an dawn tawh chin hi, Aiduzawlah 2, Chalrangah 2, Chhawrtuiaah 4, Khawzawlah 15, Hmunchengah 8, Kawlkulhah 2, Khawhaiah 1, Khualenah 1, Lungtanah 5, Tlangpuiah 1, Vanchengpuiah 4, Vangtlangah 8, Sialhawkah 19 a awm a ni.

<><><>

EASTER

Khawvel chhandamna atana khenbeh a nih hnua mihringte'n chatuan nunna an neih theih nana Isua Krista a thawhleha ni (Easter Sunday) chu khawvel ram dangte rualin Mizoram pumah nimin khan hlim taka lawm a ni.

Nimin zing khawvar hlim khan Chhandamna Sipai Pawl band party-te chuan, "Fak r'u, Isua a tho ta," tih hla chu Aizawl khawpui leh khaw hrang hrangah rimawi hmangin an rem a. Kohhran engemaw zat thalaite chuan ni chhuah rualin Biak in emaw Biak in tualah emaw Pathian biak inkhawm an huaihawt bawk a. Presbyterian kohhran chuan Pathianni danga Sunday School awm thin kha ti lovin Kohhran puiah Isua Thawhleha Ni hi an lawm a ni. Chawhma inkhawm thupui atan 'Thawhleha thu chu thu mai maiah an ruat' tih a ni.

Chawhnu Inkhawm Thupui atan 'Mi dek ula, en rawh u' tih an hmang a. Zan Inkhawm Thupui atan 'Kumkhuaa kan hnena awm zel a tiam,' tih an hmang a ni. Chawhma inkhawm banah Krista Thawhleha ni pualin thingpui ruai buatsaih a ni a, 'Easter Egg' tia sawi artui cheimawi leh thingpui hmeh hrang hrangte inkhawmhote'n an changho a ni.

Krista Thawhleha Ni hi Catholic Kohhranah chuan inkhawm azawnga urhsun ber leh ropui bera an neih a ni a. Nimin Easter Sunday-ah pawh khan 'mass' buatsaihin kohhran tam zawk chuan ruai an theh a. Zan lamah sathau khawnvar chhi engin Isua thawhleha pualin Easter procession an tih mai, mawmbati kenga kawngzawh an huaihawt a ni. UPC - Mizoram leh North East India te chuan an remchan angin anmahni kohhran theuhah hun an hmang a. Thingpui ruai an buatsaih tlangpui a, kohhran thenkhatin tlaiah ruai an theh bawk a ni.

<><><>